

مبايعة الحياة الرديئة

الفرصة الذهبية

للأفراد (5)

كورونا مرض الفردوس

ذهبت لأبي وأنا في حيرة وقلق من الأخبار
اللى بأسمعتها كل يوم عن سرعة وانتشار
المرض.

قابلت أبي وسلمت عليه وقلت له: إيه
رأيك يا أبي في الأيام دى وإيه هي الرؤية
الروحية لفيرس كورونا؟

قال: الصراحة يا ابني ممكن نقول عن فيرس
الكورونا ثلاث حاجات. أول حاجة هو:

مرض الفردوس.

قلت: أنا باسمع أن مرض الفردوس هو
السرطان!!

قال: فيه بعض التشابه بينهم.

قلت: إيه هو؟

قال: قبل ما أجوابك، هاسألك سؤال هل

تعرف إيه هو معنى مرض الفردوس؟

قلت: يعنى اللى هايجيله السرطان هايروح

الفردوس.

قال: وهل تفتكر لو حد بعيد عن المسيح
وجاله السرطان وماتبش يبقى هايروح
الفردوس؟

قلت: طبعا لا. لكن كدا إيه هو معنى
مرض الفردوس؟

قال: مرض الفردوس يعنى المرض اللي
بيدينا فرصة نتوب قبل ما نموت. فلما
الواحد يمرض ويدخل في مراحل صعبة، فلو
كان بعيد عن ربنا بيكون عنده فرصة إنه
يتوب ويرجع للمسيح فيكون ليه الفردوس،
وهنا المرض بيدى فرصة للتوبة، يبقى أفضل
من إن الواحد يموت فجأة وما يلحقتش
ويخسر الملكوت.

قلت: أه. فهمت. أنا كنت أفكر أن أي
يحد بيحيله المرض بيروح الفردوس سواء تاب
أو ماتبش. وما كنتش بافكر في إن اسمه مرض
الفردوس علشان بيدى فرصة الواحد يستعد
ويتوب ويرجع للمسيح.

قال: مافيش فردوس بدون علاقة حقيقية
مع المسيح. زى ما يقول القديس أبو مقار
" وكما أن الإنسان لا يستطيع أن يتكلم بدون

لسان، أو يسمع بدون آذان أو يمشي بدون قدمين، أو يعمل بدون يدين، هكذا لا يستطيع الإنسان أن يخلص بدون يسوع وبدونه لا يستطيع الدخول إلي ملكوت السموات"^١.

فالفردوس هو الوجود مع المسيح واللى مش هايعيش معاه ويستمتع بحبه من هنا، مش هايقدر يعيش معاه هناك. فالفردوس في المسيحية هو إنك تكون مع المسيح مش جنينة وأكل وشرب.

ففيروس كورونا فرصة لكل واحد فينا إنه يتوب ويستعد للفردوس ويفكر في أبديته.

قلت: لكن هل بالسهولة دي إن الواحد يتوب ويبقى ليه الفردوس. يعنى لو حد مريض دلوقتى وحالته صعبة، لو تاب ممكن يكون ليه الفردوس بالرغم إنه ضيع حياته في كل أنواع الشر والخطية؟

قال: يا ابني الله منتظر و مشتاق إننا نتوب ونرجع له في أي وقت. هو اللص اليمين لما

^١ عظات القديس أنبا مقار. (عظة ٣: ص ٤٥).

تاب على الصليب هو المسيح قاله "أنت
تضيع حياتك في السلب والنهب والشر
وجاي تتوب في آخر لحظة لا طبعا مش
هاقبلك!!"

قلت: لا ما حصلش كدا.

قال: فالله مشتاق إننا نتوب ونرجع له و حتى
ولو في آخر لحظة في حياتنا هايقبلنا، يقول
القديس يوحنا فم الذهب "التوبة لا
تحسب بعدد الأيام بل بحالة الروح. فأهل
نينوى لم يحتاجوا الي أيام كثيرة لإزالة
خطاياهم بل كان جزء من يوم كافيا لسحق
شروورهم، واللص ايضا لم يكن محتاجاً إلى
فتره طويلة للدخول إلى الفردوس بل في تلك
اللحظة القصيرة التي احتملت كلمة واحدة،
غُسلت خطاياها التي ارتكبتها كل أيام
حياته"^٢

فباب التوبة مفتوح طالما احنا لسه في
الجسد. لكن بعد ما الروح تفارق الجسد مش
هايكون فيه فرصة.

^٢ كتاب ستعود بقوة أعظم للقديس يوحنا فم الذهب ص ١١.

قلت: طيب إزاي أتوب؟

قال: تتوب زي ما تاب الابن الضال.

أول حاجة رجع لنفسه. فمن غير الواحد

ما يرجع لنفسه ويفكر هو فين دلوقتي،

هايفضل ماشى مع التيار لحد ما يجرفه.

فضرورى اعرف إيه اللي الغلط اللي باعمله،

إيه اللي وصايا الانجيل اللي بكسرهما!! لأنى

لو شايف نفسى كويس يبقى هاتوب عن

إيه!!!

قلت: كدا ما هايكونش فيه معنى ولا داعى

للتوبة.

قال: فالايام دى فرص إن كل واحد يقعد

مع نفسه وما يضيعاش كل الوقت في الميديا

والنت والابخار لحد ما الوقت يضيع منه

وممكن الأبدية تضيع منه وهو مش دريان.

قلت: فعلا يا أبى، مشكلة ان الواحد

بيتاخذ في تيار الميديا وطول الوقت قدام النت

ونسى إنه ممكن في أي لحظة يموت وما

يكونش تايب ولا إيه علاقة بالمسيح.

قال: تانى حاجة في التوبة.

إن الواحد يعرف إنه لو ماتبش هايهلك.

زى ما قال الابن الضال لنفسه "كم من
أجير لأبي يفضل عنه الخبز وأنا اهلك
جوعاً" (لو ١٥ : ١٧). فمن غير الواحد ما
يُقدّر خطورة الموقف مش هايكون فيه دافع
للرجوع. فضرورى الواحد يواجه نفسه
بالحقيقة، إنه لو فضل بعيد عن المسيح
هايهلك. والصراحة مش هايهلك دا هو
هالك فعلاً. فالمسيح هو الحياة والبعد عنه هو
الموت. الناس تحسب إننا مستنين بعد ما
موت ونشوف هانروح السما ولا النار.

قلت: ومش هو كدا يا ابي؟

قال: لا يا ابني. احنا من هنا بنعرف ومن
هنا بنعيش. فاللى هانبدأه من هنا هانكمل
فيه هناك، فالرب يسوع قال "ها ملكوت الله
داخلكم" (لو ١٧ : ٢١). فاللى ليه علاقة حب
وعشرة حقيقية مع المسيح هنا، هايكمل معاه
هناك. واللى ما لهوش علاقة حب ولا عشرة
مع المسيح من هنا، هايفضل غريب عنه
هناك.

هو الواحد ماقدّ رش اللي هو فيه وما عرفش
إن تلاهي الدنيا وملذات العالم آخرها الهلاك
مش هايكون فيه معنى للتوبة ولا للرجوع.

قلت: فعلا الظروف دي انذار خطر لكل
واحد فينا انه يفكر في الطريق اللي هو ماشى
فيه آخره إيه!! بدل ما يتاخذ فجأة ويخسر
دينا وآخره!!

قال: تالت حاجة في توبة الابن الضال انه
قال.

الآن أقوم وارجع.

فضرورى الواحد يأخذ خطوات عملية مش
مجرد يفكر وبس، لأن التفكير بس من غير
قرار ممكن يجيب

لذلك يا حبيبي لا تؤجل
اعمال النقاوة الداخلية
ابدا ولو لبرهة وجيزة بل
بمجرد أن تنبه لخطايا
نفسك قم وتب.

القديس ثيوفان الناسك
المحاريات الروحية ص ٨٩
ج ٢

يأس. كمان ضرورى
ما يأجلش، لأن لو
الواحد دخل في
دوامة التأجيل مش
هايطلع منها. وكل
يوم هايأجل ويقول

"بكرة". ولما ييجى "بكرة" يقوله تانى "بكرة"،
لكن الموضوع محتاج "الآن".

فمين يقدر يقول إنه ضامن يعيش لحد
بكرة. فدلوقتي هو زمن التوبة والفرصة الذهبية
للرجوع والثقة في الغفران الكامل الفوري، زى
ما بيقول القديس يوحنا فم الذهب " طالما
نحن في هذا العالم فإن كانت خطايانا بلا
حصر يمكن غسلها بالتوبة الصادقة أما عندما
نرحل إلي العالم الآخر فلن تنفعنا أعمق
توبة"^٣

فالآن فرصة إن الواحد يكون مستعد وليه
علاقة مع الله، وقتها مش ها يخاف لا من
فيرس ولا من موت ويقول مع بولس الرسول
"لأننا إن عشنا فللرب نعيش وإن متنا فللرب
نموت فإن عشنا وإن متنا فللرب نحن"
(رو ١٤ : ٨).

قلت: لكن دلوقتي صعب الواحد يعترف
وما فيش قداسات علشان اتناول؟

قال: قدم توبة وثق في الغفران الكامل لكل
خطاياك ولما تيجي الفرصة اعترف واتناول.
هو المسيح قال للص اليمين "أنت ما

^٣ ستعود بقوة اعظم ص ١٥.

حضرتش العشاء الرباني امبارح وماتناولتتش
فماينفعش تروح الفردوس!! أو قال "روح في
الأول لحد من الكهنة أو التلاميذ اعترفه بكل
حاجة وخليه يقرأ لك الحل وبعدين تعالى
علشان أقبلك!!"
قلت: لا.

قال: هو القديسة بائيسة اللي عاشت في
النجاسة والخطية سنين، واللى ماتت قبل ما

توصل الدير وتعترف
وتناول، هل ربنا
ماقبلهاش وحرمها
من السماء؟

قلت: لا. دا
القديس بولس
البسيط شاف إنه
مكانها في السماء
أعظم من مكان أنبا
أنطونيوس.

قال: هو حتى لو
حد اتصاب

الان هذه اللحظة في
يدي الغد وما بعده في
يدي الله وحتى ولو ضمن
لي الله الغد وما بعده هل
يمكن ان أتأكد انني
سأنال في الغد نفس دافع
الخير لإصلاح طريقي؟ الا
يكون مثل هذا التأجيل
جنونا كالمريض الذي
يقدمون له دواء أكيدا
لعلاجه وشفائه ثم يقول
انتظر دعوني لأمرض لفترة
قليلة ايضا هكذا الانسان
الذي يؤجل عمل
خلاصه فهو يفعل نفس
الشيء.

القديس ثيوفان الناسك
المحاربات الروحية ص ٩٦

ج ٢

الكورونا هايعرف يعترف أو هايعرف يتناول؟
قلت: لا. كل الناس هاتخاف تقرب منه.

قال: لكن الواحد ينفع يتوب ويثق في
الغفران في كل وقت وما فيش أي ظروف
تقدر تمنع عنه التوبة ولا الغفران، فتوب يا
ابني وثق في غفرانك وما تخليش شيطان ولا
إنسان مهما إن كان، يشكك في قبولك
وغفرانك الكامل وفي الأبدية السعيدة لأي
سبب. فالموضوع مش آراء، دا يا موت يا
حياة!! يا جهنم يا حياة أبدية!!

قلت: ياه يا أبي!! عشت سنين متوسوس
ومش واثق في الغفران ولا في الأبدية وكأني
مش مسيحي!!

قال: علشان كدا فيرس كورونا هو مرض
الفردوس لينا كلنا.

قلت: قصدك كلنا هانموت بالكورونا؟
قال(بابتسامة): لا طبعاً. لكن فرصة لينا
كلنا إننا نتوب ونرجع للمسيح، فلما نتوب
فإحنا كدا بقينا في طريق الفردوس.

فالظروف دي إنذار لأي حد
بعيد عن يرجع، ولأي حد كانت

الدنيا وأخذته بعيد يبدأ مع المسيح،
وسواء مات أو ما ماتش مش هايخسر
حاجة إنه يتوب ويبدأ يعيش مع
المسيح ويدوق الملكوت وهو على
الأرض.

أظن أن الظروف دي شاهد علينا زي ما
بيقول الكتاب "لم يترك نفسه بلا شاهد" (اع
١٤ : ١٧). فاللى مش هايتوب ما
هايكونش عنده حجة ولا عذر.

قلت: طيب ما ممكن بعد ما أتوب أسقط
تاني في الخطية؟

قال: يا ابني لازم نميز بين السقوط في
الخطية والرضى بالخطية. ففيه ناس تفتكر إني
لما أتوب هاأكون بلا خطية طول العمر. لكن
التوبة هي إني أرفض الخطية وأجاهد ضدها
ولو سقطت أقوم وتوب تاني. والسؤال دا
زمان اتسأل للقديس أبو مقار فقال "إذ ينظر
الرب إلي قلبك ويرى أنك تجاهد وأنتك تحبه
بكل نفسك، فإنه يطرد الموت عن نفسك في
وقت قصير جدًا. فإن هذا ليس صعبًا عليه،
ثم يأخذك إلى حضنه وإلى نوره. وفي لحظه

من الزمن ينتشلك من فم الظلمة وينقلك في الحال إلي ملكوته"^٤.

قلت: وهل ما بأسقط وارجع ربنا بيغفر لي على طول؟

قال: يعنى هايقول تعالى بكرة. أكيد على طول هياخذك في حضنه. فكل يوم وكل ساعة بنصلى ونقول "اغفر لنا ذنوبنا" ربنا هايقولك آخر الأسبوع ولا آخر الشهر. طيب ايه لازمة التوبة أو إيه فايذة الصلاة!! ياريت تقرأ نبذة المسيح يجب الخطاة ج ٢ وأنت تعرف خطورة ونتائج عدم الثقة في الغفران.

قلت: بس الحب والعشرة مع المسيح محتاجة وقت. افرض واحد ضيع سنين عمره في ملاهى الدنيا والخطية بعيد عن ربنا إيه موقفه؟

قال: بيدأ من دلوقتي. ويتكلم مع المسيح ويقول "سامحني على السنين اللي ضاعت بعيد عنك، الدنيا اخدتني والشر سحبني

^٤ عظات القديس مكاريوس الكبير عظة ٢٦ ص ٢٤٠

لكن باجيلك دلوقتى يارب ، باجي لمحبتك
عشمان في قبولك ، عاوز احب كفاية سنين
اللى ضاعت ، مش عاوز افضل كدا لحد ما
تضيع منى كمان الأبدية. عاوز احبك ،
علمنى يارب ادينى طول البال. حررنى من
الماضى ومن كل قيوده ، انا لوحدى مش
هاقدر. ساعدنى ساعدنى يارب".

فلما الواحد يصلى زى كدا باستمرار ، نعمة
المسيح هاتعمل فيه وشوية هايحصل إحلال
محبة العالم بمحبة المسيح وممكن يبدأ يتدرج
بخطوات عملية في منهج "مبادئ الحياة
الروحية". ومع الوقت هايتمو ويتشدد.

فالكورونا مرض الفردوس لكل الناس ،
فرصة لينا كلنا إننا نتوب ونرجع لأحضان
المسيح ونبدأ في طريق الأبدية بدل ما تضيع
حياتنا ونخسر أبديتنا.

ابدأ من دلوقتى. ارجع لنفسك قدّر
خطورة الموقف-وخذ موقف الآن. وابدأ
يومك حكي المسيح حتى ولو ٣ دقائق
واطلب صداقته ومعونته ليك طول اليوم. وكل
يوم يوم قبل ماتنام قدم توبة عن كل خطية

واشكره على نعمته ومحبته. والمرّة الجاية بنعمة
ربنا نكمل كلامنا.



للحصول على باقى
المجموعة PDF
من خلال هذا الموقع
mbade2.com



أو لسماع الأجزاء
مسجلة بشكل درامي

Soundcloud.com/mbade2

أو من على صفحة الفيس بوك "مبادئ
الحياة الروحية".
أو التطبيق على الموبيل "مبادئ الحياة
الروحية".